

## **Laporan Mesyuarat Tiga Pihak Berhubung MH370 Dibentangkan Kepada Kabinet Rabu Ini**

**Bernama**

**May 12, 2014**

KUALA LUMPUR, 12 Mei (Bernama) -- Kementerian Pengangkutan sedang menyediakan kertas kabinet berhubung hasil mesyuarat tiga pihak antara Malaysia, Australia dan China berhubung pesawat MH370 di Australia pada 5 Mei lepas, untuk dibentangkan kepada Kabinet Rabu ini.

Pemangku Menteri Pengangkutan Datuk Seri Hishamuddin Tun Hussein berkata penyediaan kertas kabinet itu dilakukan bersama-sama dengan Kementerian Pertahanan dan Kementerian Luar

Katanya kertas kabinet itu, antara lain akan memuatkan cadangan dalam mesyuarat tiga pihak itu berhubung fasa baharu operasi mencari pesawat Malaysia Airlines (MAS) Penerbangan MH370 yang hilang pada 8 Mac.

Fasa baharu pencarian termasuk analisis dan memperhalusi semula data satelit Inmarsat dan pemetaan dasar laut di selatan Lautan Hindi, tempat pesawat itu dipercayai berakhir, katanya kepada pemberita selepas menerima kunjungan Panglima Tentera Laut Diraja Australia Laksamana Madya Ray Griggs di Wisma Pertahanan di sini Isnin.

"Laporan itu juga, antara lain, termasuk soal pengeralahan aset-aset, yang mempunyai keupayaan spesifik bagi misi mencari," katanya.

Mesyuarat Peringkat Menteri Tiga Pihak diadakan di Bangunan Parlimen Australia di Canberra pada 5 Mei antara Hishammuddin, Timbalan Perdana Menteri Australia Warren Truss dan Menteri Pengangkutan China Yang Chuangtang, antara lain membincangkan fasa baharu bagi operasi mencari MH370.

Penerbangan MH370, membawa 227 penumpang dan 12 anak kapal yang dalam perjalanan ke Beijing, China telah hilang daripada imbasan radar pada 8 Mac lepas, kira-kira sejam setelah berlepas dari Lapangan Terbang Antarabangsa KL pada 12.41 tengah malam.

Pada 24 Mac, 17 hari selepas pesawat Boeing 777-200ER itu hilang, Perdana

Menteri Datuk Seri Najib Tun Razak mengumumkan Penerbangan MH370 "berakhir di selatan Lautan Hindi".

Hishammuddin menyifatkan mesyuarat di Australia sebagai komprehensif, lengkap dan paling konstruktif serta mencerminkan tahap kerjasama, sahasama dan kepercayaan yang amat tinggi antara ketiga-tiga negara.

"Apa yang penting adalah mesyuarat di Australia (Canberra) (dengan timbalan perdana menteri Australia dan menteri pengangkutan China) boleh dikatakan bersejarah kerana ia telah berjaya mengetepikan banyak teori konspirasi dari segi hujahan geopolitik," katanya.

"Perkara yang kami teliti ketika ini adalah pencarian di laut dalam, tentang aset miliki keupayaan spesifik dan perkongsian kos (pencarian) kerana pada masa lepas tiada perbincangan tentang dollar dan sen...untuk adil kepada rakan kongsi kami, sudah tiba masanya untuk kami membincangkannya (perkongsian kos) secara lebih serius, kerana ia (pencarian) mungkin mengambil masa lama," katanya.

Mengulas permohonan anggota keluarga penumpang dan anak kapal MH370 supaya kerajaan mengeluarkan data asal satelit, Hishammuddin berkata adalah lebih baik serahkan kepada Panel Pakar Antarabangsa untuk memutuskan maklumat mana yang patut didedahkan.

Terdahulu, Griggs dan delegasinya mengunjungi Panglima Angkatan Tentera Malaysia Jeneral Tan Sri Zulkifeli Mohd Zin dan Panglima Tentera Laut Diraja Malaysia Laksamana Tan Sri Abdul Aziz Jaafar.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1037723>